



UNIVERSITÄTS-
BIBLIOTHEK
PADERBORN

Universitätsbibliothek Paderborn

Agenda Dioecesis Paderbornensis Rituali Romano accommodata

Hermann Werner <Paderborn, Bischof>

Nevhsii, 1687

Ordo ministrandi Sacram Communionem.

urn:nbn:de:hbz:466:1-36005

generis publici peccatores : nisi de eorum poenitentia & emendatione constet. & publico scandalo prius satis fecerint.

Occultos verò peccatores, si occultè petant, & non eos emendatos agnoverit, repellat; non autem si publicè petant, & sine scandalo ipsos praterire nequeat.

Amentibus præterea, seu phreneticis communionem dare non licet; licebit tamen, si quando habeant lucida intervalla, & devotionem ostendant, dum in eo statu manent, si nullum indignitatis periculum adsit.

Iis etiam, qui propter ætatis imbecillitatem nondum hujus Sacramenti cognitionem & gustum habent, administrari non debet.

Ordo ministrandi Sacram Communionem.

DE mysterijs in hoc Sacramento contentis populus in catechesi frequenter moneatur, & doceatur, ut ea, qua par est devotione & reverentiâ maximâ accedat, Sacerdotes cum stola, clerici in sacro, Laici in suo decenti & mundo habitu communicent.

Sacerdos igitur, sanctissimam Eucharistiam ministraturus, hostijs, seu particulis, pro populi multitudine consecratis, vasculoq; uno vel pluribus, decenti & comodo loco expositis, cum vino ad purificationem eorum, qui communionem sumpserint, & ante eos linteo mundo extenso, lotis prius manibus, ac superpelliceo indutus, ac desuper stola coloris officio illius diei convenientis, præcedente ministro, procedit ad altare manibus junctis, & accensis cereis, facta prius & postea genuflexione, extrahit pyxidem, & illam super Corporale positum discooperit.

Minister genibus flexis, nomine populi, ad cornu epistolæ facit confessionem generalem dicens. Confiteor Deo &c. tum Sacerdos iterum genuflectit, & manibus junctis ante pectus, vertit se ad populum, advertens ne tergum vertat Sacramento, & in cornu evangelij dicit Misereatur vestri &c. & addit.

Indulgentiam, absolutionem ✠ facit dextrâ Crucem super populum, & remissionem peccatorum vestrorum, tribuat vobis omnipotens, & misericors Dominus. **R.** Amen.

Deinde ad altare se convertit, genuflectit, manu sinistrâ pyxidemprehendit; & duobus digitis, pollice & indice Sacramentum accipit, & elevat, conversusq; ad populum in medio Altaris dicit.

Ecce Agnus Dei, ecce, qui tollit peccata mundi.

Deinde latina lingua ter dicit.

Domine non sum dignus, ut intres sub tectum meum, sed tantum dic verbo, & sanabitur anima mea.

Postea accedit ad communicantes, & incipiens ab ijs, qui sunt in cornu epistolæ, Clericis autem ad gradus altaris genuflexis, distribuit communionem, dicens ad singulos.

Corpus Domini nostri ✠ JESU CHRISTI custodiat animam tuam in vitam æternam, Amen. **Facitq; cum Hostia crucem super pyxidem.**

Si sub Sacro communicent, post datam communionem, sumit ablutionem, dicens: Quod ore sumpsimus &c. si vero extra Sacrum, dabit benedictionem cum pyxide super populum nihil dicens, & sic cum omni reverentia reponit Sacramentum.

Poterit etiam post datam communionem dicere Ant. O Sacrum convivium in quo Christus sumitur, recolitur memoria Passionis ejus, mens impletur gratiâ, & futuræ gloriæ nobis pignus datur. **Y.** Panem de cælo præstitisti eis. **R.** Omne delectamentum in se habentem.

Y. Domine exaudi orationem meam. **R.** Et clamor &c. **Y.** Dominus vobiscum. **R.** Et cum Spiritu tuo.

Oremus.

DEus, qui nobis sub Sacramento mirabili passionis tuæ memoriam reliquisti; tribue quæsumus, ita nos corporis & Sanguinis tui Sacramysteria venerari, ut redemptionis tuæ fructum in nobis jugiter sentiamus. Qui vivis &c.

Tempore

Tempore Paschali dicitur hæc oratio.
 Spiritum nobis, Domine, tuæ charitatis infunde, ut quos Sacramentis paschalibus satiasti, tua facias pietate concordēs. Per Christum Dominum nostrum. Amen.

Antequam reponat Sacramentum, diligenter advertat, ut si aliquod fragmentum digitis adhæserit, illud in pixidem reponat, & eisdem digitos, quibus tetigit Sacramentum, abluat, & abstergat purificatorio; ablutionem verò sumat, si celebraverit, aut ijs, qui tunc communicarunt, sumentem tradat, aut saltem in Sacrarium injiciat. Postea genu flectens data prius benedictione reponit Sacramentum in Tabernaculo, & obferat.

De communiōne Paschali.

Curet sedulo Parochus, ut in quadragesima per se vel per alios concionatores populo opportunè denunciatur, constitutio Concilij Lateranensis sub Innocentio III. quæ sic habet.

Omnis, utriusq; sexus, fidelis, postquam ad annos discretionis pervenerit, omnia sua solus peccata confiteatur fidelitèr, saltem semel, in anno, proprio Sacerdoti, & injunctam sibi pœnitentiam studeat pro viribus adimplere, suscipiens reverentèr, ad minus in Pascha, Eucharistiæ Sacramentum, nisi fortè de Consilio proprij Sacerdotis, ob aliquam rationabilem causam, ad tempus ab ejus perceptione duxerit abstinendum: alioquin & vivus ab ingressu Ecclesiæ arceatur, & moriens christiana careat sepultura.

Utigitur hoc salutare Concilij decretum servetur, descripta Parochus habeat nomina suorum parochianorum, & qui dicto tempore non communicaverint, & post octavam paschæ eos, qui propriæ salutis immemores, sæpius admoniti, non obtemperaverint, Ordinario suo denuntiet.

Facilior modus deprehendendi eos, qui tempore paschali non communicaverunt in sua parochia, erit iste. Curet parochus imprimi nomen Patroni Ecclesiæ suæ in parva scedula cum anno corrente toties quoties opus erit. v.g. si Patronus sit S. Joseph. erit scedula. *S. Joseph. Anno 1687.* vel alius anni currentis numerus. Talis scedula detur cuivis communicanti; post Dominicam in albis colligantur illæ scedulæ, & qui in familia non poterunt dare scedulas, censentur non communicasse, nisi alias factam communionem probaverint.

Dabit quoq; operam Parochus, quoad ejus fieri potest, ut in ipso die sanctissimo Paschæ communicent, quo die ipse per se, nisi legitime impediatur, parochiæ suæ fidelibus hoc Sacramentum ministrabit. Alienæ verò parochiæ fideles ad proprium Parochum remittet, præter peregrinos, & advenas, & qui certum domicilium non habent: Quibus ipse Sacram Communionem præbebit, si parati illum accesserint; In cæteris verò servabit ea, quæ in libro de statu animarum præscribuntur.

Ægrotis verò parochianis, etiamsi communionem extra præscriptos paschales dies sumpserint, in paschalibus diebus illam deferet, & ministrabit.

De communiōne infirmorum extrema unctiōe, &c. V. infra.

De Sponsalibus.

PRIUS inter Sponsam & Sponsam conveniat, & utriusq; partis consanguineos & amicos, & quando de omnibus jam conventum fuerit, ad sit Parochus, eiq; aliquis proximorum ad id constitutus utriusq; partis voluntatem declarabit.

Quærat deinde Parochus à circumstantibus, an sciant vel saltem suspicentur inter Sponsam & Sponsam esse cognationem, vel affinitatem. Vel impedimentum cognationis Spiritualis ex baptismi vel Confirmationis Sacramento, quæ omnia sicut & cætera impedimenta canonica matrimonij contrahendi, & quæ contractum dirimant, Parochi est, ut ex probatis authoribus cognoscat, & si quod tale deprehenderit, eos dehortetur, vel ad superiorem remittat, & nullatenus sinat sine præscitu & dispensatione ejus, qui poterit, copulari.

Quærat deinde, à quovis contrahentium sub interminatione divini Judicij singillatim.

1. An libere velit cum N. suo Sponso vel Sponsa contrahere.
2. An alteri Matrimonium promiserit.
3. An Deo fecerit votum castitatis &c.

Deinde dantur arrhæ Pastori, quas benedicit, dicens.

V. Ad-